

文房肆考圖說

文房肆政圖說

目錄

練水唐秉鈞衡銓氏纂

卷之七

人參攷

參當辨識防害

新產今昔異地

鳳凰城

船廠

鹽貨

蘇行分等

蘇行秤兌

店家名色

大參週年頗少庫貨週年不蛀

收藏參法

防霉時候

名同參類

形似於參

真偽攢疊

諸參總較

補益似參

阿膠性下

竹莊文獻攷上

陳鶴汀竹暎山莊額題跋

唐氏世系

上邑宗姓

嘉邑宗姓

張景桓唐上采先生傳

袁簡齋江寧兩校官傳

曹菰畦江寧廣文唐先生傳

王鶴溪青藜餘照集序

道憲湘嚴韓公三經總序

文愍歸愚沈公周易詮義序

文房肆攷圖說

古婁姊大馮孝壽愚亭同叅

練水 唐秉鈞衡銓纂

家先生桐園公問

弟 秉鉞

家宰地山曹大人鑒定

甥 馮以炳

全校

姪 國漢超亭

子 鐸振

第七卷

人參攷

參當辨識防害

人參價貴。我等士人。寒素者多。澹泊自甘。寧以人參爲常食之物。然或有時進以奉親。有時自需調攝。或入場科舉。携備不時。事所必有。物非常用。偶見難分。玉石。向有以短接長者。謂之接貨。以小併大者。謂之合貨。必先用水潮過。原汁已出。又用粉膠粘紮。蒸烘做成。其力薄而易變。固不待言。又有薄夫。以參湯汜自吸。乃晾乾烘燥。做色復舊。謂之湯參。究不失爲真參。而無大碍。邇年價日昂貴。漸致以偽雜售。若不辨

識真贋。不第被欺。詎財且恐貽害。非細。故特攷人參之地。適出山之早晚。貨市之時候。形色之高下。霉蛀之收拾。及市肆之多立名稱。以眩惑人目。畧列於後。

所產今昔異地

人參。前明時。心州、高麗、邯鄲、百濟、澤州、箕州、并州、幽州、媯州、易州、平州、並產參。而上黨山谷出者為最。上黨即今潞州也。太行紫團山所出者。為紫團參。紫色稍扁。百濟參白堅且圓。名曰條參。俗名羊角參。高麗參近紫體虛。新羅參亞黃味薄。肖人形者神。類鷄腿。

者力大。高麗百濟新羅三國。今屬朝鮮。其參有子。十月下種。如種萊法。春生苗。多於深山背陰處。初生小者。三四寸。一極五葉。四五年後生兩極。未有花莖。十年後生三極。年深者四極。葉各五。中心生一莖。俗名百尺杵。三四月有花。細如粟。莖如絲。紫白色。秋後結子。如大豆。七八枚。生青熟紅。自落。秋冬采者堅實。春夏采者虛軟。本朝獨重遼參。以人參乃神草。於王氣鍾靈之處生者。味勝力洪故也。

鳳皇城

鳳皇城貨雖地道所出不一。大畧早出。白秀體鬆而瘦長者。皆名曰鳳皇城土人採取出山甚早。五六月即可揠采。九十月賈人便至蘇城開價矣。故其質不堅。皆由未經霜雪。行棖未久。統貨糙多熟少。此種低貨。惟行銷於洋廣江西。一過次年春風透時。熟則變糙。糙則更變瘍皴不堪矣。

船廠

去鳳皇城三四千里。名曰船廠。其地多巨木屋宇。道路橋梁。皆巨木所建。相傳係開海禁時。曾於是地造

洋船出洋故名船廠其處二百里內外所產較鳳皇城稍堅實且紅潤可觀但其中空鬆者確不少土人并以鉛條等揷內以圖利大約六七月采取出山冬初亦至蘇矣鉛條之白蓋土人採參者不過藏備於橐以充食鉛壺貯酒以供飲酒罄即剪壺作條以揷參耳其貨稍遜臺貨其價市嘗並驅

臺貨

臺貨者寧古臺所出之貨也地處極北去船廠五千餘里地極厚天極寒深秋之時霜雪即已載道摠在

八九月採歲終方至蘇城其體質皆由地土既厚出
山又甚遲晚所以堅實圓湛熟多糙少即或間有糙
皮而肉必紅結并無藏鉛之弊夫鳳廠臺三處比蓋
提羅大地之名而言其各有所屬一隅如老城新城
等處地道甚雜稱名甚多難以盡舉產莫悉別必須
憑貨品題難以懸擬大要以色光體圓質熟肉湛四
項兼者為上耳

蘇行分等

經商至蘇在行發店其行規店規不同凡客貨到行

時主將客貨分作三等。揀堅結紅大熟多糙少者名
統貨。其色次紅。癰皺糙多熟少者名拗色。又次色浮
白微紅質薄肉少者。加入條參者名曰泡丁。

蘇行秤兌

行秤輕店秤。以貨二十四兩二錢四分作一斤。以行
秤行貨一百換。合作店平店價六十換。故交行貿易。
每兩作九七折。作大秤算。

店家名色

參至店家必逐一細揀。分等次第以定價值。各自多

立名色。取五六十名以眩人。移步換形。難以執論。總
在自己眼力辨別。其曰拔頂熟。紅潤圓綻。全乎是肉。
每枚重一錢至四五錢者。參之最紅熟者。不拘大小。
塘西所行。故最高熟。參謂之塘西貨。揚州之行熟參。
反次塘西。

統頂細紅皮肉。圓湛六七分至八九分一錢者。
二頂細紅皮肉。或色滯。稍較頂熟。身瘦怯。六七八分
者。

次頂細紅皮肉。稍癆皺。或色滯。或瘦長。或武相。五六

七分者。

大棟熟細紅皮肉。圓湛短壯。四五分。

中棟熟細紅皮肉。或色滯身長。三四五分者。

中熟細紅皮肉。圓湛。二三分成枝者。

小熟細紅皮肉。一分四五厘至二分以外者。

條小熟細紅皮肉。身長圓瘦。有頭尾。一分以外者。

短中細紅圓湛成枝。一分上下者。

大脩尖細紅皮肉。不成枝數。皆大貨枝。稍脩下。二三

四厘。而如戟梗粗細者。其力甚薄。祇可生津止渴。調

理常病。或係蘆頭上橫生者。其性橫行指臂。無力者宜之。

二修尖。比大修尖稍細。形則同。

太參細紅短小。自成枝數。比短中更小。或瘦三四厘至一分外者。然其短緊堅實。其力不下大參。

頂條細紅皮肉身細長。無頭尾。七八厘至一分外者。大條細紅皮肉細長。五六厘至一分者。

短條細紅。若大條斷者。不成厘頭。

短丁細紅。如蜂蝶足粗細者。俗名螞蟥腿是也。

中條細紅長短不盈寸。如蜂蝶小足細者。

光頂熟光潤色明。如粉粧成。頭尾渺無粗皮。短圓文靜。單枝挺湛。或有旁枝而不岐。六七分至一錢者。光二頂光細圓湛。或稍長。武四五六分成枝。較頂熟少減一等。

光棟熟光圓紅湛而文。三四分成枝。較二頂又小一等。

光中熟較光棟又小一等。二三分成枝者。體色亦如之。

光小熟一二分成枝者較中熟又下一等。

光大條光圓而長瘦無頭尾一分外者。

光小條光圓而長一分內者。

頂兼皮形體如頂熟而有細白皮紅肉者輕重同之。

大兼皮形體如次二頂而有細白皮紅肉者輕重亦

同之。

中兼皮形體如中棟而瘦長有細白皮紅肉者輕重

同中棟中熟。

小兼皮形體如小熟而長短不分有細白皮紅肉者。

輕重同中小鰖

頂糙形類鰖皮而粗白皮頭內亦白肉不實稍頭露紅而體大質輕

棟糙形類大鰖而粗白皮者質亦輕

次糙形類中鰖而色滯癆長者

小糙形類小鰖而粗皮者如魚紅即名曰小紅糙體質極輕

紹糙形類鰖皮不拘大小粗紅皮而有肉者紹興去路故名曰紹糙鰖皮亦有紹鰖即鰖皮之皮紅細結

者不拘大小去路同

鳳參質大如頂棟中熟而細白糯皮稍頭有紅暈而中如敗絮者東洋必需

鑲鳳質輕大小如鳳參細白皮不糯微有鐵線紋者亦洋去

白梔質益輕皮泡色黃白不一形大如頂熟鳳稍質如鳳參而細長如條小形者稍有紅暈可接入鑲鳳以充鳳參

片料質輕中而有肉者皮色粗細黃白不一浙人脩

以潮透切片貿易。頗似熟參。奸商邪僧。往往鑲節眩人。然尚勝於偽者。

糙條皮糙皺而細長如頂條者。

泡頭皮色不拘黃白黑質輕重如白梔。商人備以駢接入混糙。

泡條形如中條而泡白者。

鬚條細紅如柴心者。

淨鬚紅潤細如髮。

參蘆乃參之蘆頭發苗之處也。色多白。每以體鬆糙。

貨以雜之。

空紅細紅皮而色嬌。中空而熟者。不拘大小。

白熟細糯而白皮嬌嫩。中空若兼皮者。不拘大小。

稱底乃是零星渣末。惡劣不堪之物。俱入其中。貨中

之至底至賤者也。都中稱為雜末。間有落存大段於

內。若到蘇城。一經市商之手。大者好者。俱已揀去矣。

大參邇年頗少。庫貨邇年不姓。

人參年貴一年。日低一日。此皆採取之勤。不使其年久滋養長大耳。昔之庫貨。因貯庫年遠。及至發出。故

有蟲蛙近年

皇上聖明。鑒惜臣民氣體孱弱。生齒日繁。需參日衆。隨收隨發。賜臣工而散天下。故庫貨與客貨一樣新鮮。

收藏參法

人參易於蛙蚰。頻見風日則蠹生矣。惟用盛過麻油磁瓶。泡淨焙乾。與華陰細辛相間。納盛於中。密封經年不壞。一法用淋過竈灰晒乾。罐收亦可。今蘇州店家光熟參皆包貯茶葉之中。此法最便。

防霉時候

人參變色。最怕黃梅時節。桂花黃候。大暑不使其傷。熱。淫雨不使其受濕。濕則烘之。熱則風涼之。不時啟看。勿使蟲蝕。光熟參至夏月。每遍身白點。謂之起霜。當以軟布。用新涼水。擠濕。捻去。無碍。蓋經焙其色易老。再焙色皆黑紫矣。

同名參類

太子參。雖細。却短緊堅實。其力不下大參。珠參。苦而微甘。宜於治火。味厚體重。形如芡實。

防風黨參根有獅子盤頭者真硬紋者偽

黨參今肆中所賣者種類甚多無所攷據皆不敢用惟白黨之味雖甘甚淡功力之不及防黨可知

粉沙參出於江浙去皮淨煮極熟陰乾即名紅黨

西洋參形似白泡糙參煎之不香啜之苦多宜於治火

北沙參色白形如戟梗鮮時折之多白汁故俚人呼為羊婆奶秋采者白而實春采者微黃而虛小人亦每禁蒸壓實以亂人參花如鈴鐸故稱鈴兒草

南沙參形稍瘦小而短。色稍黃。功同北參。力遜。近有
一種味帶辣者不可用。

空沙參即薺芩。又名甜桔梗。

形似於參

偽造者或以形似於參之物造作亂之。如防風沙參。
薺芩桔梗之類是也。江浙間出一種土人參。苗葉與
桔梗相似。根亦如桔梗而柔氣香。味甘美。較參稍淡。
亦薺芩也。又有野蘿蔔根。宛然是人參。以山梔甘艸
等。次第煮味於中。一時殊難辨別。惟色澤不甚光亮。

煎之湯無香味。渣不肯爛。惟脹胖耳。

真偽攢疊

參日價貴。奸惡之徒。巧於網利。恐以全假之貨求售。被人瞞破。反罹罪戾。故或以糙接熟。或以假鑲真。或用豎相雜。以攢輳。或用層相間。以節疊。做成枝極一色。宛如無縫天衣。一時眩惑人目。難以識別。名曰金鑲玉嵌。必須細心審察。庶不受欺也。

諸參總較

人參、黨參、土人參、洋參、薺芩、桔梗。多相似。人參體實。

有心而味甘。微帶苦。自有餘味。煎之易爛而渣少。防
黨體實而味甘。土人參體實有心而味甘淡。洋參雖
似體虛而氣味不香。沙參體虛無心而味淡。蘇芩體
虛無心而味甘。桔梗體堅有心而味苦。

補益似參

青蘘參。照載太史董有萬宏。偶談四川產夏州冬蟲。
根如蒜形。有毛能動。夏月其頂生苗。長數寸。至冬苗
槁。但存其根。嚴寒積雪中。往往行於地上。京師藥舖。
近亦有之。彼尚康熙時也。邇年蘇郡漸有。但古來本

艸及水諸典故。從未之及。未詳性味。近出吳遵程
從新有此品。言保肺益腎。不道從何攷據。余仍疑之。
未敢輕嘗。以意察之。其不畏寒而行雪中。則其氣陽
性溫可知。應奎書院山長孔老師諱繼元號裕堂。係
先聖裔。桐鄉烏鎮人。誠正君子也。述伊弟患怯汗大
泄。雖盛暑。處密室帳中。猶畏風甚。病三年。醫藥不效。
症在不起。適戚自川解組歸。遺以夏草冬蟲三斤。遂
日和葷蔬作肴燉食。漸至全愈。因信此物之保肺氣。
實腠理。確有微驗。嗣後用之。俱奏效。因信此品功用。

不下人參。故附誌之。

阿膠性下

家先生桐園公著禹貢圖書指掌。鈞讀至導水。知濟水三伏而四見。既伏而見。東出於濟源縣東。阿亦濟水所經。故取井水以煮驢皮。謂之阿膠。用攪濁水。則清。人服之下。膈疎痰止吐。取濟水性趨下清。故以治於濁上逆之疾。今醫方不得此意。而用以治崩帶胎動。腸風血淋等症。恐失之矣。故亦附識之。

竹莊文獻攷

陳鶴汀竹映山莊額題跋

庚寅夏得晤桐園先生於維揚官廨修竹碧梧其氣象也時出肘後拯人外譚經明道不厭性嗜浮筠繞宅素等渭川千畝近遷嚶城蒼翠碧鮮恰從牆外環映豈淇園如篋竟與有斐結不解緣耶遂取以顏其堂屬書并跋梁溪陳湘珩

唐氏世系

唐書宰相世系表唐氏出自祁姓帝堯初封唐侯其地中山唐縣是也舜封堯子丹朱爲唐侯至夏時丹

朱裔孫劉累遷於魯縣。累孫猶守故地。至商更號豕韋氏。周復改為唐公。成王滅唐。以封弟叔虞。其後更封劉累裔孫在魯縣者為唐侯。以奉堯嗣。其地唐州方城是也。魯定公五年。楚滅唐。子孫以國為氏。分仕晉楚。有唐睢為魏大夫。孫厲居沛國。漢封斥丘懿侯。生朝朝。生賢。賢生遵。遵生蒙。中郎將生臨。邛令都。都生倫。倫生林。林尚書令王莽封建德侯。生蔚。國除。徙居潁川。生武。載長。意。惠。生侍御史賁。賁生大司空珍。珍生會稽太守瑁。瑁生翔。為丹陽太守。因家焉。二子

國滂。國吳尚書。漢射生別部司馬瓊。瓊生宣。宣生晉
鎮西校尉上庸襄侯彬。字儒宗。二子熙。極。極太常丞
娶涼州刺史張軌女。永嘉末。遂居涼州。生輝。字子產。
仕前涼陵江將軍。徙居晉昌。七子。伯康。載。季賢。幼賢。
孝達。季禮。載為永世令。生弘。三子瑤。偕。諮。號三祖。
高祖本紀贊。春秋晉史蔡墨有言。陶唐氏既衰。其後
有劉累。學擾龍事。孔甲。范氏其後也。而大夫范宣子
亦曰。祖自虞臣。上為陶唐氏。在夏為御龍氏。在商為
豕韋氏。在周為唐杜氏。

師古注曰。唐杜二國名也。殷末承韋氏徙國于唐。周成王滅唐。遷之于杜。唐太原晉陽縣也。

唐氏以國爲氏。出自祁姓。亦曰伊祁。出陶唐氏之後。堯初封唐侯。其地中山唐縣是也。舜封堯之子丹朱爲唐侯。至夏時。丹朱裔孫劉累遷于魯縣。累孫猶守故地。至商更號承韋氏。周復改爲唐公。成王滅唐。以封弟叔虞。號曰唐叔。乃遷唐公于杜。降爵爲伯。今長安杜城是也。周之季世。又封劉累裔孫在魯縣者爲唐侯。以奉堯嗣。其地今唐州方城是也。傳曰。自虞以

上爲陶唐氏。在夏爲御龍氏。在商爲承韋氏。在周爲唐杜氏。成王滅唐。故子孫爲唐氏。此晉之唐也。宣公十二年傳。楚子使唐狡與蔡鳩居告唐惠侯。使潘黨率游闕四十乘從唐侯。爲左拒。其地在今隨州唐城。縣。此楚之唐也。定公五年。楚滅唐。子孫亦以唐爲氏。在晉者仕晉。在秦楚者仕秦楚。晉有唐睢爲魏大夫。西說秦。不敢加兵於魏。楚有唐狡。唐勒。勒與宋玉。景差俱師屈原。事楚襄王。文章齊名。秦有唐厲。爲漢中尉。擊鯨有功。封斥丘侯。

氏族典云按釋例唐姬姓又公子譜一曰成王封叔虞于唐號曰唐叔侯其子熒父之後春秋時國小微弱遂屬爲楚邑據此當云其子熒父之後別封於唐近於楚微弱遂爲楚屬邑又按堯之後分爲六唐氏杜氏范氏劉氏韋氏祁氏皆爲著姓豈堯澤之不泯歟

唐氏同名異實者以唐氏有二堯之後爲唐周以封晉此晉之唐也伊祁姓燮父之後封於唐爲楚所并此楚之唐也姬姓

唐仁祖傳。仁祖字壽卿。畏兀人。祖曰唐古直子孫。因以唐為氏。

唐晉昌徵音。又望出太原。

上邑宗姓

都憲公諱瑜。字廷美。英宗正統丁卯科舉人。景帝景泰辛未進士。禮部給事中。巡撫甘肅。副都御史。中憲公諱錦。字士綱。都憲公從子。孝宗弘治乙卯舉人。丙辰進士。江西提學副使。加贈中憲大夫。刑部公諱權。字季和。孝宗弘治辛酉舉人。壬戌進士。任刑部

員外郎 孝廉公諱稷字世相世宗嘉靖壬午科舉人少司空公諱國相字舜舉世宗嘉靖辛卯舉人壬辰進士工部侍郎大理公諱志大字子迪世宗嘉靖庚子舉人辛丑進士行人歷大理寺副告終養廣文公諱敏字勉之德化縣教諭都憲公諱繼祿字子庶世宗嘉靖癸卯舉人癸丑進士歷副都御史兵部公諱自化字伯成世宗嘉靖癸卯舉人癸丑進士監察御史南京兵部郎中象山公諱繼賢字子象都憲公從弟世宗嘉靖辛酉舉人象山縣知

縣 廣文公諱志孝字子順永福縣訓導 叅政公

諱本堯字世承兵部公子世宗嘉靖壬子舉人穆宗

隆慶辛未進士歷江西副使貴州叅政 通許公諱

志范字子期恩貢生通許縣知縣 楚雄公諱元偉

字觀卿神宗萬曆丙子舉人楚雄府同知 嚴州公

諱仲賢字晉卿神宗萬曆壬午舉人嚴州府同知有

惠政載嚴州志 別駕公諱國士字玉屏神宗萬曆

丙午舉人福州府通判 廣文公諱光然字爾賓安

遠縣訓導 教授公諱仲泰字雲門歷天台平江廣

信教諭。屢署縣篆。有惠政。改王府教授。廣文公諱
時微。字元成。叅政公孫。任青陽縣教諭。孝廉公諱
汝玖。字次仲。懷宗崇禎乙卯舉人。孝廉公諱廷佐。
康熙癸酉舉人。明經公諱文昌。字虞公。松江府學。
康熙四十五年歲貢。明經公諱傳。字廷一。庠姓沈。
松江府學。康熙四十八年歲貢。明府公諱班。字晚
野。榜姓程。雍正癸卯舉人。甲辰進士。授山東鄒平縣
知縣。改鳳陽池州兩府教授。廣文公諱應麟。字學
陵。金山衛學歲貢。選無為州教諭。孝廉公諱丕承。

字旦仲。乾隆庚寅舉人。孝薦公諱芬一字循叔。乾隆丙子舉人。

嘉邑宗姓

明府公諱恩。弘治戊午舉人。甲戌進士。授松陽縣知縣。副使公諱愛。嘉靖庚子舉人。辛丑進士。除南安令。歷雲南山東兩省副使。明府公諱景亮。萬曆癸卯舉人。任太和教諭。歷遷職方郎中。出知延平府。僉事公諱咨禹。字伯勤。萬曆己酉舉人。選興化教諭。歷至雲南按察司僉事。明府公諱光前。字伯俊。崇

禎二年恩貢。選常州府訓導。陞仁和縣知縣。廣文

公諱繼隆。崇禎八年歲貢。選靖江訓導。陞清河教諭。

明經公諱頤。字德倩。順治十五年歲貢。文學公

諱時升。字叔達。讀書汲古。縣宰謝三賓。合婁子堅李

長蘅程孟陽。號為嘉定四先生。入文學志。著三易集。

明經公諱嘉會。字合文。雍正壬子副榜。主政公

諱鼎。字公鈔。洪武以賢良薦。授工部主事。謫樂清主

簿。武科公諱名芳。字令貽。康熙辛酉武舉。明府

公諱貞一。字晉封。雍正朝應廣取人材例。歷漢陰醴

泉二縣知縣。太醫公諱永卿。宋時以有道者為太醫。從高宗南渡。世為醫官。五世孫輒。字玉成。薦入醫院。部郎公諱朱英。字陶然。乾隆乙卯舉人。乙未進士。榜姓董。授畢節令。遷工部郎中。

張景桓唐上采先生傳

大凡德足以滿其量者。才或短於肆應。才足以濟其用者。德未必其純全。甚矣才德之難於兼備也。我於海上先生。獨有取焉。先生姓唐氏。諱華。字上采。上邑之諸生也。先生之父鄉飲賓。號曰震揚。震揚公家道

素封。為海邦望族。生四子。先生居幼。遺業甚厚。而先生獨能義讓三兄。以故室如懸磬。而先生怡然自樂。不以德色示人。其友于兄弟如此。一生好學。經史百家。以及方技之書。靡不博覽。至古希時。猶手不釋卷。性至孝。震揚公壽登九十有五。母夫人亦九十有二。家雖貧。甘旨弗缺。問寢視膳。必誠必敬。鄉里無間言。及兩尊人相繼卧病。三兄俱屬七旬內外。力不勝支。而先生以耄百之年。獨任其勞。湯藥必嘗。衣帶不解。及病革。哀毀骨立。喪葬盡禮。聞者罔弗感泣。持已益

廉待人。益怒。雅尚節儉。見有鮮衣盛饌者。必諄諄以惜費為囑。其於子姓尤不稍寬假。長兄去世。竭力營葬。遺二子。俱不克樹立。長者廢業早卒。幼者流落不偶。先生招之歸。為之完配。以續冢嗣。姊適沈氏。年未三十而寡。有子尚在髫齡。先生周給賑恤。以濟窮孀。及年老。又命時琳兄弟。呈請當事。得邀旌獎。舅母張氏寡。亦請學臣給匾。使兩家節孝。不致湮沒。母舅包公承家貧乏嗣。包於揖亦暴露日久。先生卜地葬之。時有奸棍阻撓。智力俱憊。始得竣事。更倡義以葬其

受業師張才甫。惟拜黜姚君三喪未舉。臨沒時猶引
為除服。素性亢直。凡遇強凌弱智欺愚者。必正言苦
口以息其紛爭。一時雖逆耳。後鮮有不悔而知感者。
其盛德之及人。要非流俗之所能仿其萬一者也。訓
誨子姪最嚴。館課文字。親加批閱。以別勸懲。所以長
君時琳與猶子文昌聲傳俱能樹幟文壇。為一時名
士。孫男方沂早慧。十齡時即能作詞曲。先生切責之。
使之專心舉業。今方沂淹雅博洽。珥筆史館。以為一
邑之光。豈非先生之教澤有以致之乎。寔昌寔熾。正

未。有。父。也。先。生。生。三。子。長。時。琳。廩。貢。生。候。選。訓。導。次。時。珪。早。卒。幼。時。琰。候。選。郡。僉。孫。五。長。方。沂。華。亭。縣。學。增。廣。生。由。集。成。館。纂。修。今。奏。叙。教。諭。餘。俱。幼。業。儒。子。不。文。烏。足。為。先。生。重。然。與。長。君。純。美。交。既。久。又。最。稱。莫。逆。承。命。之。下。敢。不。勉。力。從。事。故。不。揣。荒。陋。而。為。之。傳。

袁簡齋江寧西校官傳

我國家百有三十餘載。而江寧以校官祠於學者。祇二人焉。其一曰教諭湯先生諱偉字鵬乎宣城人。康

熙康午舉人。居官時年已七旬。天倪甚和。碌碌然不
可見。淫淡夏月。短葛衣。搖扇與羣兒嬉。或上樹撲枣。
童子環啖之。先生俯而笑曰。盍留苦敗者。償老子勞。
耶。其風趣如此。及兵部侍郎法公海督學江南。威稜
言言。所至不敢仰視。初按江寧。命報程生某劣。行先
生搔首曰。程生不劣。法呵之。先生正色曰。程生不特
不劣。且賢。公命舉優耶。今晚牒且上矣。若以為劣。則
公知之。偉不知也。法大怒。叱先生出。將劾先生。江寧
先輩蔡鉉升者。與法有舊。往見法。公曰。公知程生所

以劣乎生獨嫉惡過嚴上新菴見僧奉富商木主與
天子龍牌時生詈僧誦粹而投之以故僧與商造蜚
語陷生公得毋為若輩所眩乎湯先生正人九學所
推公不知敬何也法大慚悔三肅先生而謝江寧學
舍穿漏每大雨先生持繖坐承雷下白髮淋漓客駭
問則顰蹙曰大成殿未修先聖露居而某敢即安乎
上官及諸紳士聞之爭來營度構造終先生之世學
宮煥然俸滿遷國子監典籍以篤老辭卒年九十餘
其一曰訓導唐先生諱時琳字宸枚上海人康熙甲

午歲貢持身待士。一衷於禮。甫抵任。即捐俸重修前
明周貞毅公祠。去後。諸生之感其德者。即以先生與
湯先生祠焉。乾隆三十九年。邑有修學之舉。將遷祠
周公。並遷兩先生。訓導曹君懼兩先生之澤將湮也。
屬予作傳以永之。予覽所持來湯狀甚具。而唐事寂
然。無可紀述。以故筆澁不下者屢矣。然竊念東漢諸
賢。瑰意竒行。顯顯在人耳目。而黃叔度以牛醫兒。彌
口無言。一事無為。當時欽之者。至以孔門顏子比之。
然則古之君子。固有行而無迹者存耶。抑動靜語默。

亦各視其時耶。今人間方面大府。在官赫然。去則車
未出城。民已忘其姓氏者。不知凡幾。而此二校官。獨
能以一縷香。食報於荒廬首肯之場。可知官不在大
小。唯其人。人不在顯晦。唯其真。中庸曰。誠之不可揜
如此夫。後之人。聞兩先生之風。可以觀。可以興矣。曾
君倒冠而至。偈偈然欲不朽先賢。其立志非凡所及。
是亦昌黎所云。得牽連書者。諱錫端。字菽衣。亦上海
人。

曹菴畦江寧廣文唐先生傳

唐先生名時琳字宸枚號仁巖上海人其先世分茅
土樹勲烈唐宋之世史不絕書高祖思安公曾祖淳
宇公當明代神熹之際淡於祿仕鑄戶潛修率以謹
厚稱務詩書而盡其職分之所當然祖震陽諱姚端
崇祀忠孝祠父上承諱華邑省志乘

欽定古今圖書集成咸有傳先生承世德績學勵行
以明經入成均

廷試第一有宋五子之遺風雍正八年授江寧司訓
設科條勤孝課兢兢於古人教授之法時制府趙公

宏恩以鍾容祔式表其著。學使張公廷璐以不愧師
範額其堂。其為當時巨卿碩德所推重如此。先是學
署久圯。廣文蒞是。卒就居民舍。學之西北隅有周忠
節公祠。歲遠弗葺。為茂草。先生念前代忠烈。

國朝列之祀典。不可坐視傾頽。遂捐俸脩治。重新公
位。額而識之。并結數椽於左右。以庇風雨。時集諸生
講學。其中伴士習益端。文風日振。其扶持名教又如
此。先生性孝友。弟三人先後物故。自以薄宦不獲躬
親祠祀。引咎哀愴。請假省墓。遵疾卒於家。知道者咸

嘆喆人之萎。生於康熙元年二月十六日。卒於乾隆五年十一月二十八日。年七十九。先生歿。江寧士人尸祝之。號曰小瀟溪。乾隆庚午。上海令李公文耀。續修邑乘。重先生舊德。嘆曰。恨志例無理。學部以先生入文苑中。母乃屈抑也乎。其芳徽沒而靡彰。為徵文徵獻者之推崇。又如此。歲戊辰。武林袁公枚。令江寧。以修志自任。未及采入。解組後。僑寓金陵。知廣文中。先後有湯磨二先生之賢。遂作兩校官傳。而先生行實。尚未詳盡。三十九年。重修學宮。以周忠節祠移建。

明德堂右。邑之士大夫。曾經親炙者。如秦學士劍泉。單念唐師不置。其後進者。亦習聞緒論。稱之不少衰。孝廉梅君鉞。偕諸士紳。重奉先生主。與湯先生同祔於祠之左楹。袁公嘆先生之歿。幾四十年。其行義炳志。秉教澤。掛人口。猶能以一縷香。食報於荒廬。苜蓿之場。洵乎其賢矣。復跋數行於合傳之末。以誌從前之踈畧。其流風餘韻。為士林之追慕者。又如此。先生邃於經學。如學庸集說。詩經正義。皆有成書。能闡先儒所未發。娶嚴氏。吳氏。陳氏子。二長方沂。庠生。辟充

銅板館纂修議叙知縣著有青藜餘照惘惘等集。次方淮。今名千頃。入太學。好經術。著書廿種。更通岐黃。嘗活人。孫秉鈞。幼博覽群書。能標卓識。見者莫勿驚。奇器重。孫女秉賢。孝雅儉。妻馮。孝壽中式。萬壽庚寅科十五名鄉魁。附書之。亦見先生之遺澤。其裕後昆又如此也。

論曰。漢文帝云。昔有為我言李齊之賢。戰於鉅鹿下。今我每飯未嘗不在鉅鹿也。思曩先黃門少時。與先生迭主壇坫。最莫逆。重以數世戚好。茲余又秉鐸江

寧承先生之後而服其德教者猶有存焉其亦可以
知先生之賢矣余心儀先生不啻羹牆猶每飯者之
在鉅鹿下也雖不文不足以傳先生然不禁神往濡
墨以略其梗概俟後之修志及采風作史者有所
考云年通家眷姒世姪曾錫端撰

王鷄溪青藜餘照集序

漢成帝紀河平三年光祿大夫劉向校中祕書又藝
文志向與步兵校尉任宏太史令尹咸侍醫李國柱
分校經傳諸子兵書數術方技每一書已向輒條其

篇目。撮其指意錄而奏之。後向子侍中奉車都尉歆。能繼父業。於是總羣書而奏其七略。是則劉向為修書之始也。我

聖祖仁皇帝御宇。命儒臣校修古今圖書集成。至五十八年告竣。分門纂類。咸出自

上裁。而總裁分修諸臣。亦一時之選。宜其卷帙之多。而益善矣。上海唐先生掄三。幼秉異姿。長承家學。以名諸生遊上庠。徵修是書。所閱卷以萬計。館中有疑難事。輒委之先生。故所成獨多。乃於編纂之餘。撰筆記

十卷名曰青藜餘照。蓋取拾遺記劉向校書天祿閣有太乙之精吹藜杖端爛然光明與之談洪範五行事也。夫太乙事雖近於怪。而以向之博綜天地自應上通天神。有是奇闢之事矣。且通三才之謂儒。後人蹈儒之名。沒儒之實。不復如劉向之學。亦無復太乙之下止矣。奚得此王子年為語怪乎。今先生之以青藜名其書也。意其在館之時。夜以繼日。專精覃思。安知霄漢之表。不有太乙天人者。為之燃藜以啓其明與。子產曰。天道遠。人道邇。子亦安知天道。太乙之叩。

劉向開門也。惟向自知之。或先生亦有所遇。不以告人。而僅以名其書乎。先生之幼弟彤淵。博學工著述。精岐黃業。寓膠水上。數與予還往。一日持此書屬予校定。且命為序。予讀其書。有可備史策之遺忘。有可資善否之鑒戒。洵有功於名教。不徒取其文詞已也。昔劉氏說苑。宋曾南豐校定而傳之。今以是較之說苑。固有辨矣。第恨予非南豐也。何以序為。再辭不獲。因援序以書重之例。為書其卷首。昔乾隆三十五年十二月望。後學王鳴韶頓首拜撰。

道憲韓湘巖經學三書總序

君子窮經以致用。欲為有用之儒。未有不從事於經者也。經自秦火之餘。漢儒抱殘守匱。各以所知聞教授博士弟子。支繁派衍。堅持師說。如黑白水火之不相能。宋程朱諸儒起而集其成。筌蹄支離。吐棄糟粕。微言著而大義彰矣。顧矯枉或至過正。後之蔑古者。輒藉此為訾謗。本朝

聖聖相承。聰明睿智。日臨月照。纂集羣言。嘉惠海內。易有折中。詩書春秋各有傳說。三禮有義疏。首以程

朱為準。次列歷代各家異同之說。以脩參稽。復製
聖裁。增素語於後。用示會歸之極。同中見異。異中見
同。上下二千餘年。鐘鳴石奏。聲傳響答。洋洋乎經學
之明。未有過於今日者也。衆說既陳。是非以判。如星
拱北。如車指南。昭昭乎窮經之易。亦未有易於今日
者也。雖然。窮經之弊有二。其一辨訓詁。考典實。而不
晰於大經大法之精。其一摹口吻。搜翰藻。而不達於
化民成俗之大生。

聖人之世讀

聖人之書。其束而不觀者。無論已。即觀矣而不能記。憶。及記憶而矜為該博者。其不適用則均也。夫日月。至光明也。晝夜以之運。歲功以之成。即況而愈下。以。至於曝背暄衣之舉。亦可資其用。雨露甚優渥也。禾。稼以之灌溉。江河以之通利。即其細已甚。以至於盥。手濯足之微。亦可收其用。故曰溫故知新。可以為師。又曰君子深造之以道。欲其自得之也。今直省學政。導功令。每歲科試。摘。

御纂經解為問。其原原本本。曲暢旁通者。一邑之中。

或百不獲一焉。甚者或虛無人。理不求諸心。則閱而輒忘。言不審其精。則泛而鮮當也。上海唐君桐園稽古學道。孝友忠信。博雅君子也。於五經俱有纂言。沈歸愚先生為序而存之。今年夏余以公事客吳門。唐君先以易詮義詩粹腋禹貢圖書指掌見示。語簡而義明。收繁而旨約。上承

御定諸經而挹其菁英。次遵程朱之訓而範於軌物。旁採漢唐宋元明諸儒之語。而疏以己見。不惟其詞而惟其意。醞醞而審甘。雲飛而川泳也。懋乎其力學。

之動焉乎其有味之言卓乎其垂世之書矣夫歸愚
先生績學工詩古文辭晚登仕版受知於

聖天子厚膺崇階寵榮脩至安知唐君皓首治經不
將老其才得步趨歸愚先生之後乎唐君嘗自言恥
為無用之人閒讀素問靈樞活人疾病無筭語云不
為良相當為良醫此唐君窮經之志也夫乾隆癸巳
冬日青田韓錫昨書於上海使院之宣問齋

沈歸愚周易詮義序

繅水唐君祠園密於治經以禹貢圖書指掌屬余序

矣。茲復示周易詮義一書。夫易者古聖人建天地陰陽之情而作也。卦六十四分而為上下。象陰陽也。陽故統而奇。上篇三十以象陽。陰故雜而偶。下篇三十四以象陰。通陰陽之變。莫靈於聖人。盡聖人之心。莫深於易象。旨遠詞文。言中事隱。固往哲之鑷淵。而古今之義之典數也。商瞿以來。舛謬多矣。去聖彌遠。衆說勝詞。西漢有丁孟田京。東漢有荀爽馬鄭。大都互相祖述。而古經變于費氏。以象象文言。參入卦中。實自費始。而王氏弼傳之。孔氏穎達獨取其學。然弼好

老氏魏晉譚元弼實倡之言理而涉空虛與言數而入說異弊正相埒俱無當於易之義者也夫義不精則不達義不晰則終不精桐園本宋程子之傳朱子之本義參考衆說以析其衷條分縷析通幽洞微于上下經之義不啻了然於心手間而該括以出之殆欲窺陰陽之蘊而致易義之精者歟吾嘗怪夫治易學者堅持理數兩說劃為鴻溝入主出奴均無一是殊不知理外無數數中有理二者一而已矣如乾之九二豈必有學問寬仁之義而孔子言之咸之九四

豈必有日月寒暑之義而孔子言之可知假借旁通
即數即理伊川因君子豹變而發自暴自棄之論因
君子得與而發匪風下泉之論此物此志也桐園惟
義之是詮不斷斷於理數之異說可謂有功于程朱
者矣朱子易贊曰象陳數列言盡理得學者誠即是
編以求理數之合將先河後海欲探易義夫復何難
是為序

七

文房肆攷卷七終

文房肆政圖說

目錄

練水唐秉鈞衡銓氏纂

卷之八

竹莊文獻政下

王西莊禹貢圖書指掌序

沈歸愚詩經粹腋序

沈歸愚禹貢圖書指掌序

王西莊子學類要序

朱梅園跋詩經粹腋後

朱梅園題般若心經箋註七絕二首并跋

王西莊書

又

王鶴溪書

顧星橋書

又

又

汪岑華書

徐存齋書

應奎山長孔裕堂書

朱梅園札

通州明府沈錦含書

寶山明府曾永齋書

汪少山札

唐氏纂著已刻藝文志

唐氏纂著未刻藝文志

雜攷

製造印色簡易法

取艾絨法

取蓖麻油法

製朱砂法

配合法

修理法

印色三池乾濕

印色宜忌

印章源流

摹印發明

合銀硃錠法

製膠法

水飛硃砂等法

拊金

收藏字畫書冊碑帖等法

書櫥

書燈

書窗

呵凍難書

科場煮飯

應試古學要畧

啜茶當慎

日省簿說

日省簿式

文房肆攷圖說

祖藻潛夫

兄

朝銘書旂全叅

朝鑒齡獻

家先生桐園公閱

練水唐秉鈞衡銓纂

姪國泰魯山校

第八卷

竹莊文獻攷下

王西莊禹貢圖書指掌序

古今著述有繁有簡孰爲難。曰簡者難。夫簡非徒簡而已。凡無用之書不援不足辨之說不採如此則簡矣。此非讀破萬卷不能而無識者漫取繁重部帙駭汗而推奉之何也。禹貢一篇解者多矣。最浩博者莫如胡氏錐指。全書共九百葉。予爲竄而縮之得三百葉。自謂簡矣。乃今讀吾友唐先生桐園所撰圖書指掌一編而服其精要。視予更遠過之也。蓋此篇爲千古地理書之鼻祖。解之者以歷代史志鄠氏水經注及元和郡縣太平寰宇二志爲證據以注疏及通志

堂所刻諸家經解。為辨論紛紜聚訟。動輒滿紙。然上
下四千年海桑陵谷之變。沿革分合之故。不勝其繁。
即質之目驗。亦多未協。苟非識字識古。心知其意。而
欲以游談無根。胸馳臆斷。從事焉。祇見其惑矣。先生
精心稽覈。能扶經之房輿。而不為蕪穢之異說所汨。
即以其竄切近者言之。如揚州之三江。乃吾鄉大古
蹟。言人人殊。先生獨以鄭康成南江北江中江之說
為宗。而不主蔡傳。其卓然絕識。超出流俗萬萬。即此
一條。而全書之確核。從可知矣。先生湛深經術。所著

又有周易詮義。予于易未有所得。不敢妄厝一詞。若禹貢頗嘗盡心焉。所見諸家之書。簡而可傳者。莫如先生此編。爰趣舉其質言。并諸首簡。且勸亟付剞劂。氏以嘉惠來者云。乾隆戊子重五同學弟王鳴盛頓首拜題於吳閶小山書舍。

沈歸愚禹貢圖書指掌序

禹貢一書。名雖曰貢。其文則亦典也。言禹所以治水之事。所底之績。無不甚詳且悉。其每一州之下。各究水之所歸矣。而首尾本末。其脈絡相應處。又見于導

山導水之文。若網在綱。源流貫澈。古今解者。隨文因義。以就章句。既苦無所發明。若繁稱博引。浩漫無歸。又苦其聚訟而少折衷焉。苟非於山水形勢之大。瞭如指掌。而復參究積卷。疏通證明。有以得其要領。欲求其一二言之當也。難矣。練川唐君桐園著圖書指掌二卷。其得禹貢之要者乎。禹貢釋者。不一家。大約宗山海經。爾雅。歷代史志。水經注。元和志。及寰宇記。輿地記。諸書。唐如顏氏。孔氏。宋如蘇眉山。王臨川。林三山。呂東萊。皆有著說。而曾氏彥和考證地理。頗有

依據此諸說為詳。足為九峯輔翼。至元惟吳草廬纂
言四卷。程廬山蔡傳旁通六卷。切近簡明。便於學者。
余嘗卒業於此。顧未及著有成書。桐園能引經据古。
得條理而貫通之。又不附曲說。不逐繁詞。恐致駭目。
奪心。無益于讀書之要。信嘉惠後來之善本也。夫今
日山川形勢。固非昔比。如古河自周定王時徙。已失
大禹之舊。必博學多識。以古時之文。參歷代之志。有
依據而後論定之。庶幾不謬耳。不然。如以碣石為九
門。以九江為尋陽。甚至以礫谿為砿礫。支離舛錯。不

可更僕數。非滋之患耶。桐園寧簡。毋詳。仍有所考證。以抒其所得。讀是編者。自不以蕪雜相詬病。更不以簡約而或忽之。則尋繹引申。其有以見作者之苦心矣。乾隆己丑夏五。長洲學弟沈德潛題。時年九十有七。

沈歸愚詩經粹腋序

漢說詩者四家。申、袁、韓、毛是已。三家既絕。毛詩孤行。毛亨作詁訓。授毛萇。名其詩曰毛詩。毛詩引序入經。後漢儒林傳。衛宏作毛詩序。是毛與衛遞相祖述。後鄭衆、賈逵、馬融為作傳。鄭元為作箋。世于是稱毛詩。

鄭箋。鄭夾漈之專詆毛序也。亦自有說。朱子從之。且專為之辨。夫序之作。或以為孔子。為子夏。為國史。固無可考。然從來也遠。必有所傳據。而專已抱殘之失。則亦有之。此朱子集傳更定其說。為近來學者所宗也。練川唐君桐園。究心經學。易與書俱有著述。更眎余詩經梓腋一編。其體以朱傳為指歸。參以己意。疏通而證明之。簡而明。核而脩。是固學人之發矇而研經者之先路也。余嘗讀三百篇。參朱子之所為傳。知其兼綜善取。閎意渺思。卓然千載上也。閱昨則取匡

衡上天。甚神則取國策。抑戒昊天則取國語。何以恤
我則取左傳。陟降庭止則取漢書。如此者不可殫述。
知其翼經具有苦心。即序為所辨矣。中亦有以為是
而不廢者。雖鷄鳴子衿諸什。未嘗從序。而柏舟一詩
後註孟子以為仁人。不過仍從序說。是說詩端在以
意逆志。不執成見。桐園之編。一洗聚訟之習。為之虛
衷考義。殆所謂善解經者。與。昔朱子論詩。嘗質之東
萊。及集傳成。東萊不及見。集中以為憾。今桐園治朱
子學。于傳註箋疏正義而外。思有以集其腋而會其

歸又勤勤辱問。余何以益之哉。惟是毛朱相持處。在
參觀證合。無失朱子翼經之苦心。其得矣。爰趣舉鄙
言而為之序。己丑夏五長洲學弟沈德潛題。時年九
十有七。

王西莊子學類要序

唐先生桐園雲間老名士也。著述等身。業多付剞劂。
無脛而走四方矣。一日出所未刻曰子學類要者。眎
予。屬余題其首簡。予展卷讀之。嘆桐園之苦心。可謂
善著書者。劉向校書定為七略。諸子之屬。有所謂儒

家、墨家、名家、法家、道家、從橫家、陰陽家、至於雜家、農家、小說家、則末矣。然皆兼采而不廢。與六藝並存。班固仍之。列于志。自是以下。隋唐宋明諸志。皆有之。若其薈萃諸子。以為大部。則惟宋人龔士高之六子全書。明人余有丁之子彙。此外不多見也。雖然。龔余二家。不過合刻諸家之成書耳。非有篋績纂組之勞。猶易為力。桐園此編。割取諸子膏腴。運以己意。絲聯繩貫。鎔成一氣。絕為四十八篇。譬諸集衆腋以為裘。釀羣花而作蜜。其功視龔。余不更偉歟。學者得是編而

誦之。即一卷書。而諸子英華。咸總括乎其中。在作者則博觀而約取。在讀者則事半而功倍。洵藝林中探珠之妙手。伐山之鴻寶也。桐園曩嘗有禹貢解。余嘗序之。茲編尤為奇特。蓋學博而心細。故能抽衍妙緒。日出而不窮。吁。以桐園之才。老困諸生中。當世名公卿賞識者雖多。要未有能拔而起之者。顧桐園亦恬退。不復有進取意。間或出其餘技。以醫術濟人。人亦競以盧扁俞柎目之。所至求療者如市耳。食皮相俗態類然。夫桐園之所蘊蓄者甚宏大。即著述亦不過

其碎金也。惡得以一枝槩哉。乾隆庚寅九秋同學弟
王鳴盛序

朱梅圃跋詩經粹腋後

五經中。變其體格音調。相沿成習。而極盛者莫如詩。
蓋詩之為教。足以勸善懲惡。是人性情事也。人莫不
有性情。即莫不有詩。故自三百篇後。洎漢魏六朝唐
宋金元明。代有詩人。于今

聖天子鴻章鉅製。曷曜兩間。尤為超前而軼後。凡夫
鄉曲里巷之士。以及方外閨秀。縉紳大夫。登山臨水。

五月長至卷八
弄月吟風。無不感被而成詩。至於應試者。自大吏採
風。邑令季考。庠師月課。院長校士外。自縣而府而院。
又秋闈而春闈。謹遵

功令。經義外。分六韵八韵之五排以試之。至于館閣
中。詩尤專尚此詩之一經。雖變其體格音調。獨相沿
成習而極盛也。桐園唐先生祖世以經學起家。乃口
不言詩。而心自有詩。蚤年應試。不遇。即輟業文場。獨
焚膏繼晷。殫力于經學之中。其聚精會神。所以口不
言詩。而心自有詩者。乃醞釀於詩經粹腋一書。此書

之纂述也。悉以朱傳為鼻祖。雖或旁采他說。似用師心。究不與朱子稍涉騎墻。一以紹祖父之經傳。一以啓子孫之詩學耳。予何見之。蓋余嘗捧讀其先君江寧司訓公葩經文集。因題掇義。與此書無不印合源流。故見其能紹父之一經。即可見其能紹祖傳矣。又其令嗣衡鑑世兄。嘗出四書課義及試卷見眎。無不擗摭詩詞。風雅之氣。溢於行間。故見其後人之能用經。即可見其啓後人之詩學矣。所愧者。余自幼習詩。亦自幼好詩。又自幼作詩。充囊盈几。鬱鬱然雖皆由

性情流出。而宗旨似於三百篇日遠矣。成童後。早倖遊庠。與令坦孝廉馮君愚亭先後受知於李公。是科與童子試者。作四子書文二篇。尚未

頒令作經文與試帖。明秋已外入闈。次場即作經文與試帖。少年意氣驕奢。自謂首場揣摩四書文得手。經則但求粗明詞意為無病。詩則但求諧和聲律為窮工。習其業者。究未導其源。為諸生幾及二十年矣。歲聿其逝。蒹葭蒼蒼。我辰安在。經營四方。隨口集成。經語作一首絕句詩。差可見余之境遇矣。素性不喜

藏拙因與先生歷叙之。不知先生以為可與言詩否。
乾隆乙未年仲冬兩牕三鼓練川朱綿生拜跋

朱梅圃題心經箋註二絕并跋

三經註就註心經

易詩書俱有纂本

儒釋何曾判渭涇。箇裏

最多明性語。曉人穿破是西銘。

誦經老去樂年餘。心解晶瑩一鏡虛。底事退之思闢
佛。廬其居又火其書。

歲云暮矣。諸務填心。家空而心不能空也。難把一
空字以藥之。晨起誦心經。空矣。誦家和翁箋註心

經更空而明矣。立就二絕。題於卷首。毋笑吾空空如也。晚朱綿生。

王西莊書

昨晚從玉峰回。知曾勞駕。失迎為罪。承賜名香。銘感不淺。吾哥學富而望重。餘波綺麗。雅韻欲流。乃詩文壇中高置一座之人。當與弟輩並驅中原。而盧扁之技。真其餘事也。豈世俗醫家所及乎。拙著詩文集四十卷。本欲呈政。無如卷帙重大。而交友頗多。若送一處。則餘人必羣起而責之。所以遲遲。茲值書肆來

刷例繳板頭。特以一部送上。請置案頭正之。而此不一。桐翁同學長兄先生弟王鳴盛頓首。

又

拙稿一部送上。查收彙集子書精語。深費苦心。佩服佩服。弁語容得暇題就寄上也。

王鶴溪書

易詮義。依古經文。會通程朱二傳。可以砥俗本之。悞解晰理義如鑑琉璃屏中。毫髮畢露。前人千言不能了。此以數十言了之。豈非快事。詩傳近有徐筆峒者。

依經解註。似覺簡明。但微有學究氣。文法亦不老淨。
讀粹腋一書。折衷先賢義疏。歸於至當。考據亦詳贍。
有法。洵可為朱子功臣矣。至釋禹貢。尤精審。談義理。
在空際。講地理是實際。今先生談理既粹然無疵。而
九州地志。自虞夏直推至今。瞭如指掌。先生真可謂
五經紛綸矣。承教感荷。率此鳴謝。原書六冊送上。祈
收明。臨池不盡。桐翁太老先生教小第鳴韶頓首。

顧星橋書

去春接教。旋奉候高齋。緣稍隔東西。未能時聆塵談。

為耿。比於沈宮傳師案頭細讀大著。經術湛深。信千古不朽之盛事。敬佩服。頃荷瑤華。彌綬眷注。朱鳴兄札亦已接到。稍涼即當趨候。快親風雅。率泐佈覆。順請適禧。對客走書。不罄所言。無任依切。家嚴命筆請安。桐園老先生詞壇教小弟顧宗泰頓首。

又

日前奉叩。值台駕公出。不及暢聆塵教。為悵。連旬仗雨。關風未獲時接清暉。曾於小山書舍。見敝友王宸尊兄仰慕盛名。迫欲請教。緣未識韓。乞西莊先生作

札致引想已晤悉。蒙眎大著諸書。挾經之心。鈎子史之奧。真乃當代作手。向從事有年。今得指南。昭然發矇。惟毛詩粹腋一書。尚未接到。辱命作序。扣盤窺管。夫何敢當。承愛容讀。後勉就少司馬。昨晤令孫玉琴同年。知於秋間始歸。俟歸時轉致也。原稿擬抄存硯北。以志欽佩。昨紀綱來述雅意。姑先奉繳。希為照收。竹塘先生處。前有寸緘祈寄。想久達練水。近有郵筒否。頗念念。專此肅復。順請通安。伏楮依切。不宣。

又

吳雲燕樹南北睽違。企想之私。與時俱積。令倩馮大
哥同年来都接奉。采雲彌綬垂注。兼稔近履臻茂。快
慰翹襟。馮大哥雲間碩彥。年少高掇經魁。翔步木天。
在彈指間。足徵吾先生大雅扶輪。玉潤冰清。一時推
重。叨在同譜。有不忻忭相從。領題襟之樂者耶。大著
子學。聞已開鐫。竣工後幸惠一部。是荷。謹泐小函。申
候台禧。伏惟朗照。不宣。

汪岑華書

別來又半月矣。秋風鍛羽。戢景無聊。深負知己屬望。

慚慙何似功名得失亦有何常。特累堂上屢添白髮。此則寢食不安者也。尊著禹貢圖書指掌。他人所數千言不能悉者。先生以一二語了之。是真能挾經之心者。且明白易看。最便塾中課讀。若付梓人。佇見希貴。至所畫諸州輿圖。敝館中苦無善本參考。然稍加校對。先生之繪註。不虛指掌之名。實無可復贅一詞也。李司馬處。近日未知何如。夙承關注。不敢再瀆。他若金閭一帶。此道中人雖少。館塾原未嘗廢。苟有相知。可以推薦。正課固不待言。即教詩教字。雖不才亦

可兼任。此係為貧所累。非相好如吾先生不敢為此言。亦不可聞此言也。端此奉候。近禧。統惟垂照。不宣。
桐園學長先生足下。汪景龍拜上。

徐存齋札

前遣來人。第意老哥欲備遠出驅使。故令來嚆。接來札。知意在十一二歲童子。為家庭洒掃傳命之用。上邑亦時有之。但可取得妥者。甚難。姑俟緩圖。令郎衡銓。世姪童齡好博。與談竟日。無論天文地理。經濟術數。以及一切幽僻典故。遂及遂談。源源本本。真不是

凡兒也。試之時藝。議論通古今。艷麗動心目。洋洋混混。才滿行間。固非淺陋可望見。然禁世傳世者。定當若是為之。方表湛深經史。若令即與小兒救時急策。以進學為先。宜令降心歛華。做最利小試之文。若彭學臺所取一路文字。老哥以為然乎。讀尊纂禹貢指掌。考據典核。朗若列眉。昔人稱李龍眠作山莊圖。使後來入山者。信足而行。自得道路。今老哥訓釋精當。簡括分明。殆與龍眠之神妙無異。是宜亟付剞劂。以嘉惠來學也。陳師一札。乞為轉達。現在評選之文。煩

先付下。因敝門人可以相助刻資。苟能於出門前辦就。亦可當應酬羔雁之資。特此致懇。不一。桐園二哥大人台電。愚弟日華頓首。

應奎山長孔裕堂書

屢枉文駕。具仰至愛。篆感之私。匪言能喻。敬閱手定經子各種。非好學深思。心知其意。彙萃前人之精華。曷能臻此。敬服敬服。原集昨俱一一奉繳。諒已照入。第愧無能贊一詞耳。聞大手增評何批文選。又令昆先生手著青藜餘照。尚在案頭。祈檢付來手。旅况清

閑。無可遣悶。得捧秘製。以消岑寂。不殊痛飲讀離騷
矣。幸甚。禱甚。再此外。倘有別種手批大作。亦乞檢一
二付示。爲望。率此代面。并候不既。桐翁學長先生。千
古學弟孔繼元頓首。

朱梅園札

尊著詩易。每部後附以題跋。非敢擅自塗抹。一藉以
寫懷質正。一藉以附驥傳遠。請先生裁之。特此奉趙
上桐翁著作老先生制。晚朱綿生拜手。

通州明府沈錦含書

蘇城把晤。叨教良多。奉別以來。鹿鹿簿書。晝則督理。城工。夜則披閱試卷。日無寧刻。心緒茫茫。正圖老先生指示一切。以滌風塵之氣。適敝鄉有一舍親。研窮經籍。而於易理。自問難以探奧。入幽思一通。儒相對參稽。渺不可得。鬱鬱成疾。醫藥弗瘳。自北而南。遍訪明經碩彥。上醫國手。渴慕鴻才。薰長美脩。急欲瞻仰。以請教益。而北人不慣宏濤。且屬病軀。不可航海。是以肅函奉聘。令家人沈二偕頭役相迎。祈念宿契。即為命駕。俾得叨授經義。即療沉疴。是所禱也。肅此佈。

懇順候近安不一。年家眷同學教弟沈雯拜。

曾永齋尺牘

年學長先生望重雲間。名高江左。文章五色。揮來錦
綉珠璣。心跡雙清。恰似冰壺秋月。百城坐擁。甘載鑽
研。翹企芳型。每為心折。今歲假歸粵省。暫寓礪城。得
以丰度時親。塵談飫聆。私衷快慰。筆難吐達。令郎衡
銓。世兄來寓。留談今古。咳唾笙簧。試以詩文。下筆立
就。青年學富。奚啻宿儒。真謝氏之芳蘭。房家之國器
也。偶抱貴恙。諒定速愈。以符鄙懷。特具佛手一桶。生

地一區。程蘭一端。羽綴一疋。聊申微意。稍潤文心。又
金蹄紹酒。款扇堂聯。偕朱提一函。謹奉先生。以作別
敬。希為莞納。至大著數種。蒐羅博雅。考校精詳。誠為
藝林鴻寶。緬惟古人不朽之業。端在立言。著述名山。
照灼千古。弟極欲勉擬數語。仰附青雲。奈簿書數載。
學殖荒疎。文硯塵封。殊慚俗陋。且行期在即。諸務紛
紜。每一含毫。輒復閣筆。容俟明歲來江。呈艸請政矣。
肅此達悃。並候時禧。令郎均致不一。年家眷同學弟
曾鴻遠拜

汪少山札

連日少候為歉。捧讀大著長生指要。平易純正。並無
靈竒虛渺之語。足徵先生學問之醇。而利濟於世人
者無窮也。承屬序言。不敢搦管亂寫。俟稍有暇。晷脫
稿呈削。刻下收拾行李。兼之應酬冗雜。未遑趨晤。先
將稿本繳上。羈遲疎濶之愆。惟祈格外原之耳。晚汪
紹頌首

唐氏纂著已刻藝文志

上海縣志

夢餘錄

龍江集已上提學副使

廷一問

廷一詩問

歷試草已上歲貢公

詩經文稿

歷試文鈔已上廣文公

桐園三書合鑄大生要旨一書太倉嘉定好畤諸士

一大生要旨

二教蒙楷式

三長生指要已上太學桐園公千頃著

唐氏纂著未刻藝文志

學庸集說

世綵堂詩稿已上廣文公

青藜餘照集

惘惘吟

二
一
論山制義

已上候補邑宰
論山公方沂著

周易詮義

禹貢圖書指掌

詩經粹腋

子學類要

醫學群書別類

春秋本義經註疏

漢長沙原本傷寒論註疏

心經箋註

般若金剛經箋註

譚經餘論

客問塵談

道南離辨評註

我也吟

晉昌譜牒五集

一
家禮家訓集

二
宗支世系集

留影感慕集

四待舉集

五仕宦集

己上太學祠
國公千頃著

制義分題釋法

課餘學詠存稿

課餘隨筆

四書典故糾繆

時文譜

歷朝詩鈔說體

以上秉
鈞著

唐衡銓外書九種

一大六壬啓蒙

候補郡曹賓賓公時琳著秉鈞校

二筮卜精義

魏管公明翰著秉鈞校誤

三真終必究

誥贈上禾公華未定州稿秉鈞編校

四陽宅卦命 王肯堂王陽明著秉鈞校訂合編

五內難要語

六醫學四診

七紫微星命晰微

八農圃桑麻志

九濬河程法

所列未刻諸書倘蒙留心典藉雅意斯文之君子欲綴流行嘉惠來學者不拘遐邇

賜以翰鴻即當奉書呈政均承清苦之餘反命工之費又不敢秘稿自私間出借鈔流布終隘故作此畚願圖廣其傳得利世而垂來與則

雲天通蒸永播不朽矣祈弗哂為狂妄拜干幸甚

雜攷

製造印色簡便佳妙法

製造印色。世人俱未得法。如林鶴田所傳及古今秘苑等所載。艾絨僅知手搓。蓖麻油不言取法。人以為所用無幾。何能車柞。蓖麻每以芝麻油或菜油入大口盆中。投白芨川椒於內。紙封日晒。以俟粘膩。點紙不沸而用。非經歲月不成。市肆每以紙板浸漂代艾。以菜油煎熬。少加蠟以代蓖麻。所以色不鮮明。學士書家咸視印色為佳者。難得。余家素有簡便妙法。不日可成。茲特詳列於斯。以公藝苑。

取艾絨法

斬艾一斤。揀去硬梗以及沙土。晒令乾燥。連磨五六次。於稀麻布篩中。篩去其末。篩中所存者。即是艾絨。入瓦罐或銅杓中。加水煎去黑水。捏乾。換清水再煎。再捏去黃色水。頻換水煎。直至水白。以艾置潔白紙上。毫無黃色跡痕爲度。又晒燥。再磨一次。便軟成絨。包貯聽用。

取蓖麻油法

蓖麻子一升。略炒。杵捶徧碎。以水二升。於小鍋中。或

大銅杓中煮之。俟滾有沫起。即用杓撇起。置碗中。此即油也。煮待沫盡乃止。將鍋內渣殼及水傾去。若撇起沫中。有蓖麻渣殼。則用絹絹濾淨盡。然後以沫再入鍋熬煎。俟如豬油。澆油爲度。瓷盞藏貯。聽用。不時紙覆。酒之蓋紙覆防塵。晒以防霉也。

製朱砂法

朱砂以如碎下碗片。兩面皆光而明瑩。有似箭鏃。而有蒼麥稜起者。佳。劈砂。米砂。糠砂。和尚頭砂。色皆不鮮。俱不可用。先以冷水洗過。揀去頑黯夾石者。箭鏃

中亦無此惡物。入乳鉢內研極細。至無聲。每砂一斤。用河水二十盃。入烏梅肉二兩。煎湯。以廣膠三錢。投入化烱。候冷。去滓濾清。用之以飛。所研朱砂細末。漸加漸澄。傾去黃水。以湯盡爲度。以紙覆盃面。置日邊。燂乾。不可正曬日中。以致色鈍。乾後復研如前。另煎烏梅湯。飛澄面上。黃膿全盡。再飛取中間鮮潔朱砂。底下黑脚。傾去不用。仍如前燂乾。每研盡一人之力。約半日爲準。瓶貯聽用。宣和內府印色。用珊瑚細末。故鮮如朝日。歷久不變。

配合法

飛過淨砂八兩。入蓖麻油四兩。於乳鉢中。搗至油不
浮上。硃不沈下。然後入艾絨一兩。研十日工。可入印
池。乳鉢中所沾油硃。再以艾綿少許。于鉢中研蕩淨
盡。秘苑具林氏每硃八兩。入白蠟黃蠟各二錢五分。
白礬二錢。則黏膩而色不鮮明。不可從。隨常雜用者。
不必純硃砂。只消血標一兩。新紅四錢。硃砂六錢。相
配亦可用矣。按血標以煅煉而成。其性膩滯。故銀硃
印色用必黏滯。印之四旁。不能潔淨。印下之紋。厚堆

紙上。甚至染污別處。所以林氏加蠟加礬也。硃砂乃石類。性爽。望之似厚。而實在確薄。毫不黏污。故不必用礬蠟。所以畫家着色用銀硃者。要薄而必不能薄。用硃砂者。不期薄而自薄。且純硃更覺活泛而不呆滯。而物貴賤於此分焉。

修理法

用印色。與寫字一理。寫字硯上乾。則蘸水。筆頭淡。則研墨。研墨必須蘸水。添水無不研。墨水與墨雖二物。然必合之以用也。印色之油硃亦然。印池艾乾。必須

添油。印章不鮮。必當加硃。然添油亦必加硃。不加硃。色不美。豈加硃亦必添油。不添油。又不和潤。世之用印色者。經年不爲修理。無怪印章色淡。油竭。印出模糊難看。甚有累世不知加添。日曬春杵撥動。直至印池黏滯。枯堅。甚如磚板而壞。不可修理。而竟廢棄也。其添油加硃之法。將印色撥於印池一隅。或另外安置一器。以油及硃入於池中。將撥印色之牙槩拌和。然後以用淡舊印色再拌可也。究之於乳鉢中研和。更妙。

印色三池乾濕

能書者。印色必須三池。用大圖章之一池宜乾。於前所定配合方中。增艾二錢。則少乾而圖章不沾印色。印下則字畫明朗。用小圖章之一池宜濕。於前所定配合方中。減艾二錢。則少潤而印文筆筆明顯。若中等圖章之一池。則照前原方配合。介於不乾不濕之間可也。

印色宜忌

印色最怕着鐵器。一着鐵。則色立變黑。艾立堅硬如

磚遂成廢物不可重修用矣。即鐵遇印色鐵即繡而至爛不可重磨復利。兩物之相畏忌如此又不可近火用火烘作鹽故性日曬。

印章源流

印章者本諸周禮之璽節。鄭氏謂如斗檢封者是已。漢志書凡六體曰古文奇字篆書隸書繆篆蟲書。師古謂繆篆爲文屈曲纏擾所以摹印章也。三代之制失傳無攷。維秦印朱文。漢印徑寸皆白文。今朱文則追秦白文是師漢也。魏晉唐宋元明官印私印玉與

金銀之外大都撥蠟鑄銅爲之。或用花乳壽山青田等石。至於鐫刻章法其文參差雜合大小麤細各有源流正變妙處不同。元松雪居士趙孟頫子昂貞白先生吾衍子行善學秦漢藝林首推子行著學古編爲後學津梁。有明筋骨推蘇肅民純粹推文壽承丰姿推汪杲叔樸實推顧雲美外及李蔡何歸莫不宗之。而刀法合是吾則無從焉。

摹印發明

摹印之道有三重焉。首重篆文。次重章法。再次刀法。

能於此研精講究則不失之於好奇而杜撰矣。凡欲
奏刀先須通達六書。蓋以篆入印。改點畫則背六書。
記點畫則無結構。故點畫悉稽許祭酒說文。章法一
遵秦漢印一字中上下兩旁照應。一印中短長肥瘦
大小疎密斜整參差邊旁配搭頓放結構。極經營調
劑之巧。而六書繁簡之體。仍秩然不紊。明斯章法。而
奏刀有明。將及於虛。務使直不嫌僵。曲不嫌軟。粗不
嫌肥。細不嫌弱。軋不嫌混。離不嫌孤。秀不嫌佻。勁不
嫌板。俾篆之神采奕奕生動。更得一種沉雄卓犖之

概與恬靜猶夷之趣。如活虎生龍。鮮花明月。庶爲作手。若輕浮枯寂。滯澁癡肥。重複呆笨。扭捏增損。怪癖穿鑿。不可以登鐵筆之堂矣。明季南屏太初。何震。精埒文彭。近如上洋張學之。施臨川。或蒼古。或秀勁。練川張紫庭。不假配合。天趣自呈。陳芷洲。雕鐫得心。一時名重。宗叔志霄。諱材。號半壑山人。邑諸生。工詩文。宗匠蒿公。名貴。延中洲分衡文之任。歷慕山左。滇黔篆隸法。王若霖先生摹印。則問途於陳芷洲。時多青出於藍之譽。嗣製印譜。直追趙吳興。楊南仲。王元章。

文二橋。楊傳爲世所珍。

合琅硃錠法

五漂一兩。加新紅四錢。硃砂七錢。水飛去上面黃漂。底下黑脚。曬乾重磨。凡用研淨硃一兩。用膠四錢。膠化如麪。漿厚於磁碗內。下膠或膠四硃六。亦可以畫。家口訣云。紅不紅。膠不濃也。但膠太重。用於書上。後多刺落。太輕則沾污他處。其合須照丹鉛搃錄。合墨之法。彼云。要烟細。此要硃細。膠要新。極要熟。蒸勻。色不染手。光可射人。方爲得之。然後指頭蘸油。搵之。相

和即取起於手根內。揉捏純熟。堅固爲度。捏成硃錠。或刻有印板印之。手根心上亦須用油。弗使沾硃。印板上或以金箔。或以乾硃着底。則不黏污印板。易於脫出。且顏色鮮明奪目。

製膠法

每廣東黃明牛皮膠一兩。用秦皮梔子皂角各二分。巴豆二粒去皮。同煎汁。化膠和硃。若合石青石綠。雌雄黃錠亦如合硃之法。硃砂形似箭頭者良。石青形似梅花片。石綠蝦蟆背。雌黃通明似鷄冠者佳。銀朱

帶黃色之標珠。近日摻入小粉者。不堪用。

水飛硃砂等法

取硃砂投乳鉢中。研極細。用極清膠水。同清滾水。傾入盞內。少頃。將上面黃色者。撒一處。曰標。中間紅而
且細者。是好砂。又撒一處。最下色深而麤者。可爲硃
箋。刮底也。凡欲水飛者。皆如此作。三種分撒。石青有
一種。堅不可碎者。以耳垢少許。彈入。便研細。如泥。墨
多麻者。亦用此法。石綠質堅。先以鐵椎擊碎。再入乳
鉢。

五卷八
三
拈金

先將素蓋稍抹膠水。將枯徹金箔。以食指剪去指甲。醮膠一一粘入。用指團團摩搗。待乾粘碟上。再將清水滴許。搗開。屢乾屢解。以極細爲度。若膠水畧多。則金浮起。不容細拈。只以濕而可粘爲候。再用清水將指上者一一洗淨於碟中。以微火溫之。少頃。金沈。將上黑水盡行傾出。曬乾。碟內好金。臨用時。稍稍加極清薄膠水調之。不可多。多則金黑無光。又法將肥皂核內剝出白肉。鎔化作膠。似更輕清。

收藏字畫書冊碑帖法

收藏當於牡丹開之際。或畧後。必有燥天。此時正是梅雨未至。而曬取極燥。書入櫝中。畫入櫥內。以紙封門縫。及周隔小罅隙。令不通風。不入蒸濕之氣。若着色之畫。見日烈曬。則易變色。須倒捲放鬆。於無日照處。晾之。俾燥風透入。自然乾燥。凡字畫晾過。必須緊捲。庶免壓縐之虞。古人藏書。多用芸香辟蠹。故臺曰芸臺。窗曰芸窗。編曰芸編。夫芸香艸也。俗名七里香。爾雅翼謂類豌豆。叢生。其葉極芳。秋後葉間微白如

粉。採置席下。能去蚤蝨。非楓脂白膠香也。頗難覓。不若樟腦爲便。書櫝若以香樟木造成。可不生蠹。

書櫝

士人出遠。雖淹貫古今。不免攜帶書籍。以資查核。凡書大抵皆用箱盛。若西北車馬陸路。顛擊動搖。必致釘浮板裂。擦損遺失。故惟用氈裹袱。包上下板夾。繩綑緊結。方可無虞。若東南水鄉。舟楫可通者。竹木等箱裝。亦無碍。但欲取以觀看。必要直翻箱底。一箱移動。書既難爲人亦費手。故予以木製書櫝。大小如世

用竹箱樣。則便肩挑過載。中用板作兩層。置書於中。取看殊易。櫝門如大槩文奩式。或嵌或棹。仍可封鎖。此製最妙。即家用書櫝。亦如此製。下一口有腳。可以着地。上一口無腳。以疊于下一口之上。目視似乎一口。高櫝若欲移置他室。祇須扛櫝。書則無事搬翻。殊爲惜書之一法。

書燈

青藜夜照。豈易遭逢。映雪囊螢。亦非常計。升高隨月。鑒壁借光。雖云貧士。曾爲總屬。偶然古寔。夫焚膏繼

晷三更燈火。學者所必有事也。故讀書之燈不可不爲講究。其製亦必須省而無弊爲得。夫用麻油可無烟而不損目。但價貴而易乾。非寒儒所能常辦。因錄價廉物美之法。每香油一斤。入桐油二兩和之。則難乾矣。且可辟鼠免耗。再以鹽少許置燈盞中。油可益省。以生薑擦盞邊。則不生滓暈。燈草用蘇木同煎曬乾點燈。可無灰燼。昔傳以蔓青罌粟紅花作油。每斤入桐油三兩。可以省油。余以爲多事反費。不若此方之便易可爲也。

書窗

讀書之所。若非窗明几淨。筆硯精良。何以俾胸襟開朗。文情奮發。然窗欲明亮。而必用玻璃水晶。非富貴華靡。豈肯爲此。即掉綉紗格。螭殼雲母。亦僅一時悅目。久則變色沾塵。且又不耐風雨。總不若紙糊之明朗便易也。所以官署中。及連幕書房。無不用紙。即京都公館客寓。莫不皆然。然紙必須油。方可經雨不破。其造紙訣云。桐三麻四。不須煎。十五草麻去殼。研胡粉一分和合了。太陽一照。便光鮮。其法揀潔薄綿料。

紙灑濕。既蒸過。然後上油。捲於棍上。外又布捲一層。打數百下。則油勻無迹。紙更堅薄。用以糊窗。

呵凍難書

天氣嚴寒。點水即凍。考期遇之。硯上堆冰。如何作文。卷。即鹽湯燒酒。冷極亦凍。况燒酒性不和墨。書字白色。不堪悅目。鹽湯當時落筆。易沸汚卷。日後發潮。作爛。惟石灰泡湯。可以免凍。或預磨墨汁。以管裝懸。懷中。入場臨用時。再以研細煨黑之鹽。抄少許於硯。然後滴汁。仍以墨錠磨濃用之。然皆壞筆損硯。莫若

以栗子一斤煎濃湯盛注藏懷用以磨墨不至即凍色又光潤頗佳供奉內廷及軍機處行走大人往往用此。

科場煮飯

應試士子儘有性不喜甜弗食茶點菓品必須喫飯者若帶飯冷則不可喫况秋闈八月天氣尚熱宿必味變務必漸米炊煮而平素未經習慣殊為掣肘且生於難禁作文造飯分心而顧每有費時失事之虞甚或至於忘餓而成病必當家中預煮精飯烈日曬

燥瓶裝。臨考袋帶入場。於銅杓中加水一燉。頃刻成飯。食量能喫幾許者。其水與飯乾。先在家試煮。較準多少。煮得軟硬恰好。免得場中乾濕失宜。最爲便法。再不惜小費者。以滴花燒酒一杯。置銅杓下。點火煮之。省起風爐扇炭。或用白蠟燒之。更無烟煤。

應試古學要畧

凡出賦題。若朝考召試。賦彙上舊題居多。同館課藝。亦云畧備。若學院考試。或出本郡山川形勝人物典事實。以及應時景物。如合通省士子。則出通省山

川人物諸題

凡出古體詩題。大約在于史菁華。淵鑒齋古文。及昭明文選詩賦上。句子居多。騷之以後。不見出以爲題。凡出今體詩題。則路更廣濶矣。一切唐人詩句。俱以爲題。間亦出宋元明人詩句。

學院考古學。大約四題。賦古體詩。今體詩。共去三題。其一題。或頌或贊。或箴或考之類。惟小零碎耳。若題是擬古。必須按定其時事實。其人口吻。一切後代典故。不可用於篇中。四題全做。固妙。如風簷寸晷。力有

不能或過生題。不知題之出處與其做差。不如寧闕。即做一二題。亦不為不完卷而犯規也。

昔人作賦。貴在典博。今則厭其堆堵板實。惟尚清徹。若近體詩。定制五言排律。或六韻。或八韻。古體詩。主司限韻多少不同。自當遵守其命。毋可任意增減。若作賦。祇限韻。並不定句多少。故長短可以自由。總之四五百字足矣。長則做費工夫。勝亦費力。况冗雜太長。恐失檢點。或犯忌諱差誤之處。考古學。最須敏捷。交卷宜速。遲則收卷。諸官不以爲

奇。況在場官吏。俱不耐煩守候。奈催喧擾。自亦匆忙。急遽。必致失於檢點。謄寫亦不舒徐。以致錯落不工。殿試卷。長六尺二尺五六寸。召試卷。長一尺五六寸。上下天地頭去五寸餘。中間紅格。約長尺許。紅印直格六行。行約六分。橫無格眼。謄每行一十七字。字要不長不扁。體須方正。每字約六分光景。與直格作方樣爲合式。但字不可參差長短。橫看有一條布白。方合其式。

吸茶當慎

茶可滌煩療渴。明目益思。見之子史。如陸羽茶經。丁謂茶錄。言之詳矣。然六經無茶字。丹鉛總錄云。茶即古荼字。詩云。誰謂荼苦。其甘如薺。是也。郭璞云。早采爲茶。晚采爲茗。葉老爲荈。茶經云。其名有五。一茶。二檟。三設。四茗。五荈。今則浙閩江淮皆有。通謂之茶。與古所食殊不同矣。邇年茶價漸昂。贗貨蜂起。蘇州善人橋數百家。采桺葉。如做茶法。出汁烘焙而市。本州言桺苦寒無毒。治風濕瘡疥。肢痛。陶朱公曾稱種柳千樹。可足柴炭。其嫩芽可作飲湯。則知原可代茶。尚

爲無害。無如人性狡黠。貪心無厭。恐人辨識。虎邱石馬街中數百家。竟以泡過茶葉。重加藥料。做與原茗一色。老少男婦。賴以爲生。網利商僧。每本幾千金。發夥於各州縣。收買泡過茶乾。積貯其做回殘茶之散戶。早攜做好者交行。仍換茶乾。我餘值以歸度日。如抱布買絲。年無虛日。所以此時之茶。非實在早春。竟不可飲矣。以早春葉嫩。不可重做。故爾。其所用之藥料。乃雌黃、熟石、羔花、青柏枝汁、青魚胆等類是也。其用石黃者。以其性淫。茶葉亦性淫。二淫相合。則晚茶。

殘片。變若早春。用花青者。亦取其色青豔也。用柏枝汁。取其青香。魚胆水漂去腥臭而用者。取其味苦也。石黃性毒。經火甚於砒霜。故用石羔以解熱毒。又能使茶有霜頭起而色美也。人常飲之。隱受其禍。若胃虛脾弱。立發嘔吐。作酸脹滿腹痛等病。今做回殘茶而漁利之徒。所在多有。凡我烹茶啜茗之士。可不慎而辨之。與其啜殘茶。毋寧飲甘菊、金銀花、蜜炒嫩桑枝、桑葉、五加皮、枸杞、嫩芽、蓮鬚、沙蔴、梨、藕、柿餅、姜、棗、洋糖、飴糖、鍋焦等。各隨性之所宜而飲之。爲得也。

日省簿說

太微仙君有功過格。東坡蘇公遵行推廣。遂盛於世。晦庵朱子著讀書法。元程敬叔先生輯讀書功程。本朝陸稼書先生較訂讀書分年日程。歷任撫臺於紫陽書院。立功課簿。皆欲學者去邪從正。明體達用。不至坐失歲月。徒悔遲暮之良法美意也。余伯父掄山公仿仙儒之制而變通之。立日省簿。直書項款。橫記事爲其首。天時者欲知氣運之正變。畱心趨避而頤養。且補田家之占候也。次往來者。稽損益之親

疎以覘已之得喪也。次著作者所以考勤惰。戒無懈也。次居處者所以謹閑遊。杜淫蕩也。次飲食者所以謹口腹。甘淡薄以養神智也。次出入者所以量出納。節財流。非義不苟取與也。次書信者所以通神交。相覘成也。至月底用小結。歲終用總結。則一年之舉動行爲了如指掌。可以自勉。可以告人。有考核而不致荒情邪僻放縱矣。此省身寡過之良法。存心養性之始基也。

日省簿式

日

月

時天

往來

著作

處居

飲食

出入

信書

子聖文天公雜文

文房肆政卷八終

八
是
子
方
ノ

三